

**Govor predsjedavajućeg Predstavničkog doma Parlamentarne skupštine BiH
Šefika Džaferovića na prezentaciji rada Globalne organizacije parlamentaraca u
borbi protiv korupcije (GOPAC)**

Sarajevo, 17. april 2015.

"Poštovana poslanice Parlamenta Zapadne Australije, gospođo Behjat,

Poštovana poslanice Narodne skupštine Republike Srbije, gospođo Filipovski,

Poštovane poslanici i delegati Parlamentarne skupštine Bosne i Hercegovine,

Poštovani predstavnici Agencije za prevenciju korupcije i koordinaciju borbe protiv korupcije,

Poštovani predstavnici Razvojnog programa Ujedinjenih Nacija u Bosni i Hercegovini,

Poštovani gosti iz Narodne skupštine Republike Srbije,

Poštovani predstavnici diplomatsko - konzularne mreže i međunarodnih organizacija sa programskim ciljevima u Bosni i Hercegovini,

Poštovane kolege saradnici iz Sekretarijata Parlamentarne skupštine Bosne i Hercegovine,

Poštovani predstavnici akademske zajednice i nevladinog sektora u Bosni i Hercegovini,

Poštovani predstavnici medija,

Dame i gospodo,

Sve vas srdačno pozdravljam i želim vam dobrodošlicu u Bijelu salu Parlamentarne skupštine Bosne i Hercegovine, u kojoj se danas održava prezentacija rada Globalne organizacije parlamentaraca za borbu protiv korupcije - GOPAK.

Ja sam Šefik Džaferović, predsjedavajući Predstavničkog doma Parlamentarne skupštine Bosne i Hercegovine.

U organizaciji Razvojnog programa Ujedinjenih nacija, danas imamo priliku učestvovati u prezentaciji djelovanja GOPAK-a, Globalne organizacije parlamentaraca u borbi protiv korupcije.

Prevenција i koordinacija borbe protiv korupcije za Bosnu i Hercegovinu, svakako, predstavlja jedan od najprioritetnijih zadataka predstavnika institucija vlasti na svim nivoima. Percepcija javnosti u našoj zemlji pokazuje da građani smatraju da korupcija, nakon niske zaposlenosti i niskog životnog standarda, predstavlja sljedeći najveći problem u bosanskohercegovačkom društvu.

Prema posljednjem Indeksu percepcije korupcije za 2014., kojeg je *Transparency international* objavio krajem prošle godine, Bosna i Hercegovina se na listi 175 zemalja nalazi tek na 80. mjestu, što u poređenju sa godinom prije toga predstavlja pad za čak osam mjesta. Činjenica da je od svih država iz sastava bivše Jugoslavije upravo Bosna i Hercegovina najniže rangirana na svjetskoj listi indeksa percepcije korupcije, sama po sebi treba biti alarm za uzbunu predstavnicima zakonodavnih, izvršnih i sudskih institucija na svim nivoima vlasti u Bosni i Hercegovini i podsticaj da se hitno i bespoštedno uhvate u koštac sa ovim gorućim problemom.

Novi saziv Vijeća ministara Bosne i Hercegovine će, kao jedan od svojih prioriteta, imati i usvajanje nove Strategije i Akcionog plana za borbu protiv korupcije za period od 2015. do 2019. godine. Riječ je o dokumentima na kojima su radili članovi radne grupe koji dolaze iz svih relevantnih državnih i entitetskih institucija zakonodavne, izvršne i sudske vlasti koje se bave ovom problematikom. Nova strategija i akcioni plan predstavljat će smjernice za rad Agencije za prevenciju korupcije i koordinaciju borbe protiv korupcije u narednom petogodišnjem periodu, a time i parlamentarne Komisije koja prati rad ove Agencije.

Borba protiv korupcije mora biti jedan od ključnih prioriteta novih vlada na svim nivoima. Ovo predstavlja jedan od glavnih zaključaka iz Izvještaja Evropske komisije o napretku Bosne i Hercegovine za 2014. godinu, u okviru kojeg se navodi da je naša zemlja postigla mali napredak u provedbi reformi za suzbijanje korupcije, koja i dalje nanosi štetu cijelom javnom sektoru. Iako je pravni okvir za efikasno sprječavanje korupcije uglavnom uspostavljen, u Izvještaju Evropske komisije navodi se da je provedba zakona slaba i dalje nedosljedna, te da pojedini ključni propisi nisu u skladu sa međunarodnim standardima.

Usvajanjem Zakona o Agenciji za prevenciju korupcije i koordinaciju borbe protiv korupcije 2009. godine Bosna i Hercegovina je dobila Agenciju za prevenciju korupcije i koordinaciju borbe protiv korupcije, kao nezavisnu i samostalnu upravnu organizaciju, koja za svoj rad odgovara Parlamentarnoj skupštini BiH. Istim Zakonom, uspostavljeno je i tijelo - Komisija koja prati rad ove Agencije i vrši izbor njenog rukovodstva.

Upravo su članovi ove Komisije bili inicijatori do sada jedine izmjene i dopune Zakona o Agenciji za prevenciju korupcije i koordinaciju borbe protiv korupcije, kojima su riješene određene pravne nejasnoće i nedorečenosti prvobitnog zakonskog teksta. Njegovim kasnijim usvajanjem, Komisija za izbor i praćenje rada Agencije za prevenciju korupcije i koordinaciju borbe protiv korupcije postala je nezavisno tijelo Parlamentarne skupštine Bosne i Hercegovine, a pored do tada definisanih, Komisiji je u nadležnost dato i razmatranje izvještaja o reviziji finansijskog poslovanja Agencije za prevenciju korupcije i koordinaciju borbe protiv korupcije, kao dodatni alat parlamentarnog monitoringa rada ove institucije.

Protekle sedmice Komisija za izbor i praćenje rada Agencije za prevenciju korupcije i koordinaciju borbe protiv korupcije dobila je i šest novih članova koji dolaze iz Parlamentarne skupštine Bosne i Hercegovine, među kojima i predsjedavajuću i prvog zamjenika predsjedavajuće Komisije. Kako se radi o jedinstvenom tijelu Parlamentarne skupštine BiH, u čiji sastav, pored poslanika i delegata oba doma ovog Parlamenta, ulaze i predstavnici akademske zajednice, odnosno nevladinog sektora, na Konstituirajućoj sjednici ove Komisije definisano je da, kao i u prethodnom sazivu, funkciju drugog zamjenika predsjedavajuće obnaša osoba iz akademske zajednice ili iz nevladinog sektora, čime je dodatno data važnost aktivnog učešća u ovoj Komisiji ljudi koji dolaze izvan Parlamentarne skupštine Bosne i Hercegovine.

Ovdje želim naglasiti i to da su upravo poslanici i delegati Parlamentarne skupštine Bosne i Hercegovine u proteklom mandatnom periodu, među kojima jedan dio nas ovdje prisustvuje današnjoj Prezentaciji, bili inicijatori Zakona o zaštiti lica koja prijavljuju korupciju u institucijama Bosne i Hercegovine. Kao razloge za donošenje ovog zakona Parlamentarna skupština je prepoznala potrebe koje proizilaze iz većeg broja međunarodnih dokumenata čija je potpisnica Bosna i Hercegovina, a tu u prvi red spadaju UN-ova Konvencija za sprečavanje i borbu protiv korupcije, Rezolucija 1729 Parlamentarne skupštine Vijeća Evrope iz 2010. godine, kao i Krivičnopravna i Građanskopravna konvencija o korupciji Parlamentarne skupštine Vijeća Evrope.

Dame i gospodo,

Pravni okvir postoji. Potrebno je imati hrabrosti i političke volje da se on u potpunosti provede. Institucionalni podsticaj borbi protiv korupcije u narednom periodu treba da dođe iz ovog Parlamenta. To je i misija GOPAK-a, organizacije čiji će rad danas prezentirati naši gosti.

Danas, ovdje, od gospođe Liz Behjat poslanice u Parlamentu Zapadne Australije, koja predstavlja jednu od 52 zemlje članice Globalne organizacije parlamentaraca za borbu protiv korupcije, imat ćemo priliku čuti i vidjeti prezentaciju o globalnoj akciji GOPAK-a, aktivnostima i procedurama za otvaranje poglavlja pristupanju GOPAK-ovoj mreži parlamentaraca, te iskustvima Parlamenta Zapadne Australije u njihovom dosadašnjem djelovanju u okviru Globalne organizacije parlamentaraca za borbu protiv korupcije.

Pored toga, cijenim da će svima nama, u prvom redu poslanicima i delegatima oba doma, kao i predstavnicima stručne službe sekretarijata Parlamentarne skupštine Bosne i Hercegovine, od posebne važnosti biti saznanja koje tokom današnje prezentacije dobijemo od naših kolega iz Narodne skupštine Republike Srbije, u pogledu njihovih dosadašnjih iskustava i djelovanja u okviru Globalne organizacije parlamentaraca za borbu protiv korupcije.

Jasno definisana misija GOPAK-a jeste smanjenje stepena korupcije u svim državama svijeta, poboljšanje efikasnosti rada parlamenata, kao institucija koja nadzire rad organa

izvršne vlasti, i gdje upravo parlamentarci trebaju da budu lideri u globalnoj borbi protiv korupcije. U prilog svakako ide činjenica da parlamenti imaju ustavna i zakonska ovlaštenja i nadležnosti da izvršne organe vlasti pozivaju na odgovornost, pri tome znatno unapređujući inicijative za borbu protiv korupcije.

Povezanost i bliska saradnja parlamentarnih sekcija GOPAK-a sa relevantnim sekcijama organizacije *Transparency international* u svakoj pojedinoj zemlji, jasno govore o neophodnosti kohezije nadležnih parlamentarnih tijela sa organizacijama civilnog društva u svakoj pojedinoj državi članici.

Na kraju, želim da navedem da od današnjeg skupa lično očekujem da se svi prisutni parlamentarci, a naročito članovi Komisije za izbor i praćenje rada Agencije za prevenciju korupcije i koordinaciju borbe protiv korupcije, upoznaju sa novim saznanjima o djelovanju Globalne organizacije parlamentaraca u borbi protiv korupcije, kao i o procedurama za otvaranje poglavlja o pristupanju GOPAK-ovoj mreži parlamentaraca.

S tim u vezi, želim da se zahvalim Razvojnem programu Ujedinjenih nacija na prilici da nam omogući adekvatne sugovornike, koji će pomoći poslanicima i delegatima Parlamentarne skupštine Bosne i Hercegovine da se upoznaju sa GOPAK-om, njegovim ciljevima, kao i iskustvima drugih zemalja u radu unutar ove organizacije.

Svima vam želim uspješan rad i ugodan boravak u zgradi Parlamentarne skupštine Bosne i Hercegovine!" (kraj)